

هاني عزيز
أسف مضطر أخونك

سونون

جميع حقوق الطبع والنشر محفوظة

الطبعة الأولى مارس ٢٠١٩

الكتاب : أسف مضطر أخونك

الكاتب : هاني عزيز

تدقيق لغوي : احمد محمد عبد الستار

تصميم الغلاف : عماد رشدي

رقم ايداع 7560

ترقيم دولي: 978-977-688-18-6

دار سنون للنشر والتوزيع

الزقازيق - الشرقية - مصر

١١١٤٦٤٣٧

sonon. pub@gmail .com

أسف مضطر أخونك

سنون

سنون للنشر و التوزيع

هاني عزيز

ازاي ممكن الواحدة تحس بالأمان مع اللي قلبها اختاره

أنا الأمان أنا الأمان
 كلمة على كل لسان
 ازاي أمان وأنا خايفة
 وكل شوية منك بتهان
 ازاي أمان وانت مش عارف
 يعني إيه معنى الإنسان
 حتى لو عليا خايف
 برضه غير نفسك مش شايف
 كل همك المظاهر
 وقدام الناس تتظاهر
 إنك بتحبني وخايف عليا
 وإنك قد المسئولية
 ما لو الموضوع بس حراسة
 ما الكلب أكثر شراسة
 ودايما عنده وفاء
 وبيتأثر بالبكاء
 حتى وأنا زعلانة
 مش لازم تعمل قلقان



ولا لازم تعرف الحكاية
حضن واحد بس كفاية
أحسنلي بلاش تتكلم
علشان متعبش وأتأمل
أصل كلامك كله لوم
بيطير مني النوم
بس عارف في حاجة غريبة
حاسة إن في قلبك طيبة
لسه برضه عندك مشاعر
بس مش بيا شاعر
بس خلاص لازم تحس
إن أي كلمة فيا بتمس
الأمان عندي هو الحنان
حتى لو مش عليك بيبان
أنا هحسه من نظرة عينيك
وعطفك ولمسة إيديك
ده انت بقيت مكان أبويا
اللي عرفني معنى الحنية
وشال عني المسؤولية
وقالك حافظ على الأمانة
وقتها قلت دي في عينيا
وقالك أبات شبعانة

بس شعبي مش هو الأكل
أصلها حاجة بالعقل
ما أنا باكل لما أجوع
إنما ألمي مش مسموع
هتחס بقلبي الموجوع
حتى لو بنظرة فيها حنان
وتكسر ضهري من الأحضان
وقتها أحس إنك سندي وبيا ولهان
هو ده عندي معنى الأمان

الحب عايش وموجود بس معمله حواجز وسدود

سألوني عن الحب
 قلت لسه موجود
 بس جوة القلب
 معمله حواجز وحدود
 وقع في حارة سد
 لازم حيطانها تتهد
 أصل القلب اتحول لحجارة
 من كتر الجرح والمرارة
 محتاج قلب تاني يهده
 وبمشاعر الحب يمهده
 يرجع تاني زي زمان
 قلب بمشاعر انسان
 يدي حب من غير ما يخاف
 أصل هو ياما شاف
 غدر وقسوة فاتصدم
 وخلي الحب يتهدم
 بس القلب جاي وراجع
 يهرب من الحزن والمواجع



واللي جارحنا هيسيينا
وهتحرم عليه دمعتنا
وغملى الحب في القلوب
ونكسر القلوب الطوب
والضحكة ترجع في الوشوش
ونشوف كل وش بشوش
الحب لسه موجود
بس تكسر حواجزك والحدود

حاولت أفهم كلمة بحبك مقدرتش

بحبك. . كلمة يقرأها القلب قبل العين
 بحبك. . . كلمة عقد بين اثنين
 بحبك. . كلمة بتحرك الشفايف
 كلمة. . . تخلي القلب شايف
 مش هتخليك ثاني خايف
 هي كلمة جمعت قلبين
 كلمة حمرت الخدين
 بس يا تري هتاخذنا على فين
 على فرح ملوش حدود
 ولا جرح يعيش ويسود
 هي كلمة من أربع حروف
 هي كلمة معناها معروف
 معناها أنا ليك وأنت ليا
 انت خلاص مليت عينيا
 اوعى تغيب عني ثانية
 ولا خايف تكون وهم
 وتضرب في القلب سهم
 تقلب حياتك غم

وتعيش شايل الهم
هي كلمة مالهاش فهم



مفیش کلمه هقدر أقولها غير بحبك

سمعتي قلبي لما نده اسمك
 طب شفتي صورتك لما جه ورسمك
 بس أكيد مقدرش على وصفك
 أصله لسه جديد وييتعلم
 عمره ما كان لقلب يسلم
 كان خايف يتجرح ويتألم
 بس أول ما شافك نطق واتكلم
 أول كلمة كان اسمك
 بس بصوت واطي زي صوت همسك
 بس أكيد صوته وصلك
 أصل القلوب بتسمع بعض
 لأن قدرها تكون لبعض
 احنا كمان هنكون لبعض
 عايش علشان أحبك
 لو مت برضه بحبك
 اديني عقلك وقلبك
 بحبك بحبك بحبك
 عمري ابتدى معاكي

هعيش أيامي وياكي
يا عمري يا أغلي ملاكي
بحبك
وعايش علشان أحبك

خلي إيديكي دايمًا في إيديا

خلي إيديكي تمسك إيديا
 تعالي نتحدى كل الدنيا
 كل هموم الدنيا تروح
 أول ما عينك تيجي في عينيا
 طالما حبي ليكي محسوس
 كل الصعب عليه هندوس
 لو حبك مكفاش قلبي
 أعمل قلب ليه مخصوص
 تعالي نبدأ الحكاية
 بس هقولك في البداية
 الحكاية إني بحبك
 حب كبير ملوش نهاية
 اوعي الحب منا يضيع
 في المشاكل والمواضيع
 أنا علشانك أبيع الدنيا
 بس أنا حبي مش للبيع
 في كل خطوة انتي معايا
 لو مش جنبي حبك جوايا



رسمت صورتك جوة قلبي
دقت فيه كام دقاية
سامع صوتك جوة قلبي
بيقولي حبيبي جنبي
كل ما أحس إنك معايا
بيضيع مني ألمي وتعبي
أيوة يا حب بطلب وبقول
أنا وحبيبي نعيش علطول
من غيره مش عايز الدنيا
وهتكون أنت المسؤول

إهداء إلى حب حياتي

أيوة بحبك وبغير عليكي
 أيوة بعشق نظرة عينيكي
 أيوة بتمنى لمسة إيديكي
 بتنفس من هواي
 خبيني يلا جواي
 عمري ابتدى من ساعة
 ابتديت أبقا ويائي
 ارويني أنا عطشان
 بحبك والأحضان
 قوليلي لو زعلتي
 أخاف أكون غلطان
 أيوة عليكي بغير
 ما حبك ليه تأثير
 كل ما أبص لعينك
 بكون ليكي أسير
 إيدياط مش هتسيبك
 خلاص بقيت حبيبك
 اوعي تضيعي مني

مش هعرف تاني أجيبك
بقيت في حبك هايم
يا ريته يفضل دايم
أعيش وأموت في حبك
وأنا صاحي وأنا نايم

إهداء مني لكل واحدة بتدور على الحب الحقيقي

لو عشت عمري أرضيكي
 أجيب عمر منين
 ده العمر من بعديكي
 ما يساوي ثانيتين
 حياتي في بعدك مرار
 وحبك أجمل قرار
 لو ادوني كنوز العالم
 غيرك مش ممكن أختار
 لو زعلتي اوعي تسيبيني
 أنا أصلي مش ملاك
 دي حياتي لو تهجريني
 محكوم عليها بالهلاك
 معاكي بحس بالأمان
 والزعل ملوش مكان
 مفيش في الدنيا إنسان
 يساوي فراقك من حياتي
 الدنيا معاكي بقت حلوة
 ملهاش وصف في أي غنوة



لو قدمت الدنيا ليكي
عمري ما يكمل إلا بيكي
حبك ملا حياتي
وجودك حلا أوقاتي
هتفضلي أعلى ما ليا
حتى من بعد مماتي



انتي النفس اللي بتتنفس بيه

علشان بحب وشاريكي
 علشان انتي اللي حلمت بيكي
 قلبي مش هيكون غير ليكي
 اسمك حفرته في قلبي
 حياتي وانتي جنبي
 والذنب ده مش ذنبي
 بتنفس من هواي
 يعني انت عندي حياة
 حبك يستاهل المعاناة
 وجودك في حياتي معناه
 بتتنفس من هواي
 الفراق ملوش معنى
 خلاص مش قادر استتنا
 مين عن حبنا يمنعنا
 بتتنفس من هواي
 لما سهم الحب بيان
 القلب يعيش ولهان
 والحزن ملوش مكان



بتتنفس من هواي
ما خلاص الحب جمعنا
عين الحسود ابعدني عنا
عن حبك مش قادر أستغنى

بتنفس من هواي
مين قال الحب أوهام
أمال ليه مش عارف أنام
غير لما أسمع أحلى كلام
بتنفس من هواي

كل يوم انتي في بالي وخيالي

كل يوم في أحلامي
 انت في بالي
 في خيالي
 ازاي أنسى حبي
 مالك قلبي
 وكياني
 كل لحظة حلوة
 حب في غنوة
 هي معاك
 شوق عمري
 وحياتي
 ألقاك
 سنين بتمر
 ويفوت العمر
 بس عمري عشته
 وأنا بين إيديك
 أيام تعدي
 ومشاعر مش بتهدي



والشوق يزيد
وأنا بين إيديك
عائش جوايا
حبك بقا حكاية
بس أجمل حكاية
وأنا بين إيديك
عمال أناديك
دايما مستنيك
أتاريك جنبي
وأنا بين إيديك
قلبي استناك
عمري ما هنسك
ولا عمري أنسى
وأنا بين إيديك
ليالي سهران
قلبي بيك فرحان
بس فرحة قلبي
وأنا بين إيديك
وتعدي الليالي
وحبك شاغل بالي
بس أنا مرتاح
وأنا بين إيديك



تعالى نعيش
حب مينتهيش
أنا بحس بحبك
وأنا بين إيديك
بحلم ببقاك
بحلم أبقا معاك
أعيش باقى عمري
وأنا بين إيديك
كل يوم فى أحلامي
انت بالي
فى خيالي
بس حلم عمري
أبقا بين إيديك

عمري ما هنسى أول حب

أنساك ازاي يا حبي
 وأحب من جديد
 أعيش مع قلب تاني
 ازاي هكون سعيد
 مالك يا حب بينا
 بقيت ليه عنيد
 حيننا من سنين
 في الآخر الحب ضاع
 الهجر فرق بينا
 بقينا عايشين في صراع
 هو ده فعلا كان حب
 ولا ده كان خداع
 بتبكي ليه يا قلبي
 جايز ألقى حبيب
 يقضي عمره جنبي
 ويكون هو النصيب
 أنا عارف إنك مجروح
 مش هيداويك طيب



هعيش أيامي الجاية
وأنسى حبي اللي فات
وأمسح دموع عنيا
وأفرح ولو ساعات
أعمل إيه مش بإيديا
أنا حب عمري ما مات
هو أنا فعلا حبيت
ولا عايش في وهم
مانا اللي بإيدي جريت
وضربت في قلبي سهم
سامحيني يا حب عمري
مكنتش معاكي سهم

هفضل أحتفل بعيد ميلادك لأن عمري الحقيقي ابتدى معاي

عليكي عمال أدور
لقتك مش معايا
مش ممكن يوم أتصور
إن هي دي النهاية
نهاية حب كان
هعيش طول العمر
ويمر الزمان
وأنا عايش في مر
أصل الحكاية لسه
عايشة في عقلي وخيالي
ليه يا زماني تقسى
وتخلي قلبي خالي
وجه يوم ميلادك
هولع الشموع
عينيا عليكي بصة
مليانة بالدموع
دمعة ولعت بيها شمعة



على تورته عيد ميلادك
بغني وانتي مش سامعة
تعبني أوي فراقك
بس سامع صوتك في قلبي
بيغنيلي بصوت عالي
بيقولي حبيبي جنبي
يلا عدي يا ليالي
وعدت الليالي
وانتي مش معايا
ولا مرة جه في خيالي
حبك يموت جوايا
في قلبي انتي عيشة
بس أنا اللي بموت
خليتي مشاعري طايشة
أحسنلها السكوت
بضحك وأنا ببكي
وأنا بتكلم عنك
خلاص مش قادر أحكي
مستني أبقا جنبك
والنهاردة يوم ميلادك
أنا بنقص سنة
عمري وأنا في بعادك
عمال يتفنى

هو صحيح الحب أعمى

اه من عينيكى السود
 ليهم بقيت مشدود
 ولما بشوف الورود
 بدور عالورد الأسود
 فتحت تاني عينيا
 لقيت عينك بنية
 استني كدة شوية
 برضه أجمل عيون
 ركزت نظري شوية
 لقيت عينك عسلية
 دول أجمل ما في الدنيا
 شغلولي بالي ليالي
 خلاص مبقتش فارقة
 لقيت عيونك زرقا
 مبقتش عندي مفاجأة
 دوبت في أجمل عيون
 أثارها طلعت عدسات
 عيونك برضه شربات



لونتى بيهم أيامى
هحبك انتى بالذات

هفضل محتفظ بوعودي انتي كمان اوعديني

أوعدك

أفضل احبك مهما حصل
كل أيامنا تبقى غسل
مش شهر بس نعيشه في العمر
وباقى حياتنا تبقى مر
هكون راجلك وحاميك
بحياتي وعمري أفديكي
في الآخر انتي اللي ليا
وكل ما فيا هو ليكي
هعيش معاكى أجمل إحساس
وأديكي تقدير قدام الناس
كلمة بحبك كلمة صعبة
مش أربع حروف وخلص
لا دي ليها معنى كبير
حب وعشرة معاه تقدير
كل واحد فاهم الثاني
بنظرة وضحكة وتعبير
والأهم أحفظ كرامتك

قدام الناس أديكي قيمتك
هتحدى العالم علشانك
لو حد مرة جاب في سيرتك
او عديني
تديني قيمتي وتقديري
وتكوني عليا بتغيري
غيرة حب مش كرامة
انتي أدرى بقلبي وضميري
تقدرني كل ظروفي
متضايقيش من كتر خوفاي
متصدقيش كلمة عني
تسمعي من غير ما تشوفي
أسرار حياتنا تبقا في بير
مدفونة في قلبك الكبير
زعلنا مياتش يوم
حتى لو ترمي عليا اللوم
لو مرة متضايق وزعلان
اديني شوية حنان
ده حضن واحد منك كفاية
وبكدة نبدأ الحكاية



الحب خلاص جمعنا

حروفنا اتجمعت وقلب جمعهم
 وقلوبنا اتكلمت تعالي نسمعهم
 بيقول بحبك ومش داري
 بس خلاص مش راح أداري
 بحلم بيك ليلي ونهاري
 عايش بالي ولهان
 كلمة بحبك ليها معنى
 أول ما الحب جمعنا
 ابعد يا حزن عنا
 خلاص ملكش مكان
 حبك ولا كان على بالي
 مش عارف إيه اللي جرافي
 أيامي عمالة تحلالي
 اوعى تعدي يا زمان
 أول ما قلبك اتكلم
 قلبي رفع إيده وسلم
 وخلاص من حبك اتعلم
 وحس بالأمان



أيوه كده احلوي يا دنيا
متسبنيش يا حبيبي ثانية
حياتي بقت حاجة ثانية
القلب عايش فرحان
بعدك عني بيتعبني
خلي قلبك يكلمني
بس قوليله اوعي يسبني
وأرجع أعيش حيران

اكتشفت إن الحب وهم

قلبي زي المركب ومش عارف يرسى
 تايه في بحر الحب ومش لاقيله مرسة
 ما كل ما يبجي يقرب القلب الثاني يقسى
 هلاقيك تاني يا حب ولا أبعد وانسى
 قلبي من تعبته بقى زي الريشة
 طاير في الهوا زي دخان الشيشة
 من كتر النفخ تاه وسط العيشة
 من خوفا عليه هغطيه ببيشة
 خلاص دلوقت بقا مستخبي
 وحبه اللي فيه هداريه وأخبي
 خايف عليه والذنب مش ذنبي
 ذنب اللي باعوه واشتروا قلب جنبي
 قررت قلبي مش للبيع
 قررت قلبي مش هيضيع
 لا هو حمل بهدلة ولا تقطيع
 قلبي لسه في الحب رضيع
 من صغره واهو انجرح
 في مشاعر الحب تاه وسرح
 على كل قلب بالحب سمح

كانت النتيجة إنه اندبح
بس مين يوقف النزيف
من كتر تعبته بقا خفيف
زي مركب من غير مجاديف
تايه في مشاعر جرح وزيف
بس شافه قلب بعيد
قلب زيه عايش وحيد
قلب في بحر الحب شريد
قلب عايز حب جديد
قلب برضه كان مجروح
قلب عايز للحب يروح
قلب عايز بمشاعره يبوح
بس حرجه كان مفتوح
ناداني وقال ضمدي جرحي
رجعلي أملي رجعلي فرحي
تعال شوف السبب في دبحي
هحكي حكايتي وأطول في شرحي
طلعت حكايتنا نفس الحكاية
ولينا في الحب نفس الغاية
حب يعيش للنهاية
حب من أبو وردة وشمعاية
حب بكلمة وهمسة
حب بتنهيده ولمسة

حب يرجع لنا البسمة
حب يترسم في القلب رسمة
ياه قلبي أخيرا دق
من فرحه اتحرر واتفك
افرح يلا عندك حق
أديك أهو حسيت بفرق
الحب دق بابك
الحزن والههم سابك
على شوق وفرح جابك
بعد الجرح الي نابك
ياه على ده الإحساس
هحب ثاني خلاص
وحبيبي يحبني يا خلاص
محدث يقومني يا ناس
بس خلاص صحيت من النوم
من حلم بحلمه كل يوم
حلم ألقى حب يدوم
ويخرجني من الهموم
أصل الحب في الأحلام
دي حقيقة مش كلام
أحسنلي أروح ثاني أنام
بدل ما أصحى على أوهام

زعلان منك علشان مش حاسة بيا

زعلان وحاطط إيدي على خدي
 بنادي عليك مش بتردى
 وبقينا على الحال ده كتير
 بعد ما بقيت فى حبك أسير
 بنادي عليك وانتي مش بتردى
 حقك مانا صوتي مبقاش عالي
 من كتر ما بقيت بسهر ليالي
 قاعد مستنيكي بس تظهرى
 بس مشكلتك مش بتقدرى
 زعلتى علشان بحبك وبغير عليكى
 وبقولك إني ليكي وملك إيديكي
 ما أنا فعلا محتاج أوي حبك
 وكل همى فى الدنيا هو قربك
 بس انتى مش مقدره الحب
 ولا حاسة بمشاعر ولا لهفة قلب
 عايزة حد يضحك عليكى
 ويتغزل فى شكلك وجمال عينيكى
 بس أنا كنت الوحيد اللي هحافظ عليكى

بس انتي مش بتقدري
ولا حتى عايزة تقررني
فسيبيني وحيد قاعد ولا بيدي
ويا دمعة تعالي وباتي على خدي

مش عايز أفضل تاني وحيد

ليه وحيد
 ليه وحيد ومحدث فاهمني
 أتكلم محدش سامعني
 وحيد وأنا بين الناس
 أصل الوحدة بتتنقاس
 بالحب والإحساس
 يا ناس أنا عايز أحبكم
 مش تحبوني
 طب ليه تبعدوا عني
 وتسيبوني
 ما انتو كنتم جنبي
 وبتساندوني
 إيه اللي غير طبعكم
 وقسي عليا قلبكم
 أنا مش عايز غير حبكم
 مش عايز أفضل تاني وحيد



مين كان سبب الفراق؟؟؟

لو مكتوب علينا الفراق
 لازم يحصل بينا اتفاق
 ازاى قلبي اللي اتعلق بيك
 تطلب منه في لحظة ينسأك
 جاي تقولي مش بإيديا
 طب أقول إيه أنا لعينيا
 خلاص مفيش تاني حبيب
 بعدها ما ملك قلبي هسيب
 كل حاجة حلوة اداها
 ومشاعر الحب عداها
 مش باقي تاني فرح
 أهلا بيك شرفت يا جرح
 جرح كبير اتكتب باسمه
 طريق الفراق هو اللي رسمه
 بس مين كان السبب؟
 مين اللي حب ومين اللي باع
 هو ده كان حب ولا خداع
 أسأل قلبي ولا عقلي

ولا أدخل معاهم في صراع
هو قبل ما أحبك فكرت
ولا تلاقيني في لحظة افتكرت
إن قلبك اللي حبك
راح ومجاش
تاه في زحمة مشاعرتتعاش
شوق وفرحة تنهيدة
علاقة حب حلوة جديدة
تصارحني بحب أولها
طب كدة تيجي في آخرتها
وتقولي وداع
طب كدة قلبك باع
بس مين كان السبب؟
عايز تسيبني فجأة
كنت عاملهالي مفاجأة
ذنبى إن قلبى اتعلق بيبك
ذنبى إيه. . ده أنا كلي ليك
كسرت قلبى بجد حرام
دي مش غلطة ده فعلا إجرام
ده جرح كبير صعب العلاج
قلبي فعلا كده محتاج
طبيب يداوي الجراح

مفیش تانی کلام یتقال
بس یفضل عندی سؤال
مین کان السبب؟

ساعة الفراق إحساس صعب وصفه

ساعة الفراق القلب يئن
 تعالى الأشواق وصوتها يرن
 قصة كثير ا تكررت
 وقلوب كثير ا تدمرت
 بس القلب ليها بيحن
 قصة حب كلها شجن
 قلبي هيدفع التمن
 قلبي حبك بإخلاص
 أصله كان قرب خلاص
 في غرامك يتسجن
 حبك اللي في قلبي محفور
 مكتوب عليه ميشفش النور
 ياما عشاق
 بيشوفوا فراق
 دلوقت جه عليا الدور
 ابكي يا قلبي بصوت مسموع
 امشي يا ضحكة تعالي يا دموع
 حبيبي راح

ساب الجراح
هرمي الورد وأطفي الشموع
بعد ما سهم الحب يصيب
يطلع إنه مليش نصيب
هو الحب مجرد وهم
ولا مكنش عندي فهم
إن الحب مجرد تعذيب

ما تروح يا جرح مع اللي راح

أبكي على اللي راح
 ولا كافياني جراح
 لو اللي راح مش راجع
 ليه قلبي فيه مواجع
 ليه يا حزني عايش
 والفرح عني حايش
 ما تروح مع اللي راح
 وتسبب للضحكة براح
 ليه معاندة يا قسوة
 وجروحي مش منسية
 ما تروحي مع اللي راح
 وتعودي يا أفراح
 ليه يا هم معايا
 وحيرة البال جوايا
 ما تروح مع اللي راح
 وتخلي البال مرتاح
 ليه يا صاحبي تخون
 وعليك العشرة تهون



ما تروح مع اللي راح
خلي الجرح ينزاح
ليه يا شقا ملازمي
وتعب الدنيا معذبني
ما تروح ما اللي راح
صبري هو المفتاح
يا رب جاي أدعيلك
وكل همي أشكيلك
معاك أنا همي راح
دعايا هو السلاح

قررت أعيش من غير حب

القلب الجبان
 في الحب ملوش مكان
 لو خايف أوي على قلبك
 خليه يا سيدي عطلان
 يا ناس أنا مش غلطان
 الحب ملوش أمان
 مانا كنت سايب قلبي
 واتبهدل من زمان
 حبيت يمين وشمال
 وفضلت على ده الحال
 في الآخر اللي حبيتهم
 طلوعوا شوية أندال
 هفضل خايف على قلبي
 وده ذنبكم مش ذنبي
 كل ما أبص لعيونكم
 بحس بتأثير سلبي
 عيونكم كداين
 في الغدر أوي شاطرين



أنا مش عايز غير أحب
بس أنتم مش عايزين
مش عايزين غير الجرح
عملتوا في قلبي شرح
الحب جديد عليكم
لسه عايزين له شرح
قررت أعيش وحيد
من غيركم أنا سعيد
ملكمش دعوة بقلبي
خليكم عنه بعيد

لكل واحدة كنت السبب في جرحها أو لعبت بمشاعرها سامحيني

سامحيني

أنا عارف إني سبب جرحك
أيوة أنا كنت بلعب بقلبك
وعارف إنك صدقتيني
بس الذنب مكنش ذنبك
لأنك حقيقي حبتيني
بس أنا مهمنيش حبك
كنتي عايزة تملكيني
وتديني كل مشاعرك
لو عايزة تاني تسمعيني
كلمة واحدة بس هقولك

سامحيني!!!

سامحيني كنت جبان
وجرحك عليا هان
لما حبي بان
كنت بخدعك
سامحيني كنت قاسي

ومشاعر الحب ناسي
ولما بان إحساسي
كنت بخدعك
سامحيني على الدموع
وأنيك المسموع
لما ولعت الشموع
كنت بخدعك
سامحيني على الكدبة
وإني عملتك لعبة
ولما حسبت الحسبة
كنت بخدعك
أيوة خدعتك ولعبت بيكي
أيوة كان همي أضحك عليكي
أيوة مشاعري مكانتش ليكي
كنت بخدعك
جاي وبقولك غلطان
ومشاعري مش مشاعر إنسان
كنتي عايزة حب وحنان
ولما قلت أنا عاشق ولهان
كنت بخدعك
خدعتك يا أطيب قلب
خدعتك وقلبك حب



واتأثر بمشاعر سلب
كنت بخدعك
اديتيني حب بحرارة
وسبيتك بقيتي محتارة
هتعيشي في جرح ومرارة
كنت بخدعك
هي لعبة حب وخداع
قلب اشترى والثاني باع
قصة حب مصيره الضياع
دي لعبة بنلعبها كل شوية
على كل بنت عايزة حنية
نجرح ونشوف واحدة تانية
بس شوف كام قلب اتوجع
وكام قلب في الحب وقع
بعد ما كلام الحب سمع
بس فين وجع الضمير
يا ترى هنواجه نفس المصير
قلب يخدعنا وبعدها يطير
سامحيني

مش مسامحة جرحك

هو انت خلاص كدة ارتحت
 لما قسيت وفي قلبي جرحت
 كنت عايشة في حبك عمياء
 بس خلاص أنا فتحت
 عشت معاك أجمل أيامي
 دايمًا صورتك تيجي قدامي
 حبك ملا قلبي وكياني
 قلت عليك فتى أحلامي
 مكنش فيه في رقتك
 كل مشاعري حسيتك
 حتى لما كنت بتزعل
 بتقول الغلطة غلطتك
 حسيت معاك بالأمان
 افتكرت إنك إنسان
 مكنتش عايزة أث حاجة
 غير الحب والحنان
 قلت هتديني الحنان
 وتكون ليا الأمان



بس اللي طلبته مني
مكنش في البال والحسبان
ولما قتلتك مقدرش
قلت عليا مقدرش
ولما سألت تاني عن حبك
رديت وقلتي معرفش
أكلمك مش بترد
آجي أقرب تاني تصد
ولما مرة رديت عليا
رديت عليا بصوت يخض
لما سألتك إيه الحكاية
رديت وقلت دي النهاية
كنت عايز تسرق مني
بس لحقتك من البداية
كنت بتحبني لغرض
بس عقلي صحي ورفض
بس أعمل إيه لقلبي
جرح القلب أكبر مرض
لما حبيت اتخدعت
كنت هفرح اتمنعت
كنت عايشة في حبك عمياء
بس خلاص أنا فتحت

خيانتك ليا كانت ظاهرة
بس أنا مكنتش حذرة
مش هسامح جرحك ليا
ههتف وأعمل ألف مظاهرة
ياللي عامل الحب كدبة
قلب البنت ده مش لعبة
قبل ما تقول بحبك
لازم تعمل ألف حسبة

صدقت حبك بس اتجرحت

صدقتها

أصلي كنت محتاجة

كلمة بحبك

مش عايزة غيرها أي حاجة

قلبي ساعتها رفر ف وطار

دق بقوة بعد انتظار

قال خلاص حسيت بالحب

مكنش همه الانكسار

عشت معاك أحلى أيام

عمالة أسمع بس كلام

لما عقلي فهم الحكاية

حسيت إنه شوية أوهام

عرفت إنه مجرد لعب

بس قلبي عجبه الكذب

كل الحكاية إن ذنبه

كان محتاج شوية حب

بس انت مكنتش سهم

ضربت جوة قلبي سهم

غلطة عمري صدقتك
وإني عشت معاك الوهم
حنيتك قلبت نار
قلبي الطائر داق المرار
حبك ليك أكبر كدبة
سقط قلبي في الاختبار
بس أنا اللي أستاهل
إني صدقت بالساهل
لما كنت بتخدع فيا
قلبي ساعتها مكنش سائل
جرحك ساب فيا علامة
طلعت من القصة ملامة
ولما عقلي فهم الكدبة
خرجت منها بالسلامة
قلبي خلاص دلوقت اتعلم
مش لأي حد يسلم
أصل جرح الحب كبير
مش هقدر تاني أتألم



خلاص حكايتنا خلصت

خلصت كدة الحكاية
 احنا مش هنكون سوا
 بس سيب قلبك معايا
 ولما كمان قلبك نوى
 ينسى كل حبي كمان
 ويسيب قلبي اللي كان
 مستعد يديه عمره
 كل الشوق والحنان
 معقولة كل الحب راح
 مبقاش باقي غير الجراح
 قلبي هيتعب أوى من بعدك
 وأكيد مش هيبات مرتاح
 ازاي أنسى حبك ليا
 طب أقول إيه لعينيا
 مش هتشوفي أغلى حبيب
 ليه كدة ضلمتي يا دنيا
 شكل حبنا كان وهم
 بس مكنتش شايلة الهم



إنه في يوم هيقلب غم
وأعيش في عذاب وجراح
هو ذنبي إن أنا حبيت
وكل مشاعري وشوقي اديت
رغم إني كثير حسيت
إنك في يوم هتبعني
اه يا قلبي يا مجروح
لسه هتفضل تاني مفتوح
لسه ناوي للحب تروح
ولا خلاص الصدمة قوية
هتفضل عايش حيران
تسأل لو كنت غلطان
الحب كسرك من جواك
مبقتش حاسس بالأمان

هو حي هان عليك؟؟

هو أنا فعلا هونت عليك
 ياللي كنت أغلى ما ليا
 دي نظرة وحدة من عينيك
 كانت تساوي كنوز الدنيا
 مكنتش عايزة أي حاجة
 ولا عمري كنت محتاجة
 غير حاجة وحدة
 إن قلبك يضمني
 كنت جاي قلبك مجروح
 وكان نفسك بالحب تبوح
 وريحة غدرك كانت بتفوح
 بس قلبي صدقك
 عشت معاك أحلى أيام
 وسمعت منك أحلى كلام
 بس شكل عقلي نام
 وانت بتنطق اسمها
 أتاريك لسه بتحبها
 وقلبك ملهوف لحضنها



ومشاعرك اللى بتحسها
مكنتش ليا كانت ليها
صدقت كل لحظة معاك
غصب عني لازم أنساك
رغم إن قلبي رماك
مش ناسية اللى عملته فيا
قلبي هيفضل كدة تعبان
وهيبقا من الحب جبان
خليه أحسن كدة عطلان
مش مسامحة جرحك ليا

خلاص ابعء عني وسيني أعيش

عيش وسيني أعيش
 ارحم قلبي متجرحنيش
 لو حكايتنا آخرها وجع
 أحسن لها ما تتديش
 ليه كنت بتقولي بحبك
 وقلبك مش حاسس بيا
 أنا فعلا كنت صدقتك
 لما قلت الكلمة دية
 لازم تعرف أوي معناها
 مش لأي حد تقولها
 ده القلب بيطيير معاها
 وبيتأثر من مفعولها
 فاكر أول مرة شوفتك
 حسيت إني ملكت العالم
 ياريتني ما كنت صدقتك
 حبك ليا مبقاش لازم
 عمال تكذب طول الوقت
 وعمرك ما لقلبي اشتقت



مبسوط إني هعيش مجروحة
يا رب تكون كدة ارتحت
كنت عمال تلعب بيا
وهمتني بحبك ليا
ليه كنت بتكذب عليا
أنا مش عايزة غير حنية
قسوة حبك جرحت قلبي
قلبي يعيش علطول مجروح
الذنب كان فعلا ذنبي
إني لحبك كنت بروح

اللي جرحك ميستاهلش دمعتك

متستاهلش!!
 كلمة حب ليك وقت الفرح
 متستاهلش!!
 مشاعر حبي خلتها تتحول جرح
 متستاهلش!!
 أي دمعة نازلة من عيوني
 متستاهلش!!
 عيونك القاسية تاني يشوفوني
 خلاص مش هشوفك تاني
 عينيا كرهتك
 خلاص قلبي هيعاني
 من كتر قسوتك
 كنت فاكرة إني خلاص
 عرفت أخيرا معنى الحب
 وكنت هحب بإخلاص
 بس طلعت من غير قلب
 الخيانة طبع فيك
 ومش بحس بأماني



ولما أعوزك مش بلاقيك
ظهر خلاص الوش الثاني
وش كله غدر وقساوة
وطبعه إنه يخون
ومش مقدر الغلاوة
وعليه العشرة تهون
بس خلاص مع السلامة
مش هسامح جرحك ليا
بس طلعت أنا الملامة
إني اديتك كل ما ليا
خدت مني كل حاجة
وأنا ولا حاجة واخدة
ما الحكاية مش محتاجة
غير إني أقول كلمة وحدة
متستاهاش!!

بعترف إني خدعتك وانتي كمان خدعتي نفسك

أيوة أنا بضحك عليكي
 بس انتي ادتيني الحق
 عمري ما هكون ليكي
 لأنك عمري ما قلبي دق
 أنا فعلا إنسان أناني
 عجبنتي كلمة بحبك
 قلت يلا أسمعها تاني
 بس انتي كنتي مستنياني
 أقولها لك وأبقا الجاني
 أجرح وتقولي اه ياني
 بس استني كدة ثواني
 هو انتي فعلا حبتيني؟؟
 ولا برضه كنتي أنانية
 وكلمة بحبك مستنية
 قلبك مش صافي النية
 كان ناقصه شوية حنية
 في الآخر كنتي هتسبيني
 احنا الاتنين كداين



من المشاعر محرومين
وبالعذاب مربوطين
والاسم متجوزين
خلاص من حبك احرميني!!
أنا مش عايز أبقا أناني
مقدرش آخذك من واحد ثاني
أنا برضه كمان متجوز
بس هي كانت ناسياني
خليني أرجع ثاني وحداني
بس يا ريت توعديني .
تسامحيني لو كنت جرحتك
وتنسيني ولو فرحتك
وتعيشي ثاني براحتك
وإلا كدة هتعذبيني!!
لأن قلبي مفهوش مشاعر
وعمره ما كان بيكي شاعر
كان في حبك بيصارع
بطلب منك انسيني!!



ليه بتدي تبرير للخيانة؟؟

سميت خياتنك ليا ملل
 وقلبك راح بغيري انشغل
 واعتبرته حق إنك تخون
 مع إنه حق مش مضمون
 لأنك مش عارف تصون
 لا حب ولا عشرة باقي
 كله عليك بيهون
 قلبك راح لقلب تاني
 هعيش في جراح وانت الجاني
 أعمل إيه. . انت أناني
 قلبي يا ريت يعيش وحداني
 مش قادرة أرجع لحبك
 خلاص انساني
 وتيجي تقول الموضوع عادي
 وعائز قلبي يفضل هادي
 وتقولي بصوت استبدادي
 لازم أصبر علشان ولادي
 بس لازم تعرف



إن أنت البادي
وتطلب مني أصبر عليك
عايز تجرحني وأبوس إيديك
خلاص قلبي مش ميال ليك
وأنا شايفة غدر جوة عينيك
أنا إنسانة ليا كرامتي
أنا مش جارية تحت رجلك
طب ما انت كمان ممل
وعمال فيا تذل
ويوم ورا يوم يعدي
قيمتي عمالة تقل
ترضى إني أخونك
وتعيش في مر وغل
بس هترضى بالخيانة
ولا تعتبرها إهانة
تحبس مشاعري في زنانة
ده أنا لسه برضه إنسانة
مش فاكر وصية أيويا
خليها في عينك أمانة



آسف مضطر أخونك وده السبب

آسف مضطر أخونك ولا مليس الحق
 مانا كل ماجي أناديكي بسمع كلمة لأ
 مش حاسس باهتمام
 ولا حتى بالكلام
 وكل ماجي أعاتب
 أطلع أنا الملام
 فين حبنا اللي فات
 والشوق والتنهيدات
 لما كنا بنتكلم وبنسهر بالساعات
 أنا زي أي انسان
 محتاج حزن وحنان
 أول ما هلاقيهم
 هديكي الأمان
 أنا طفل كبير وهمي
 تبقي أمي وتضمي
 طلبي بسيط وسهل
 بس انتي عن كبر وجهل
 اهتميتي بحاجة تانية



وضعت منك في ثانية
وكل ماجي أتكلم
أطلع أنا الملام
فعلا أنا الملام!!
أصلي عايش في أحلام
أنتي عندك طموح
لأي سكة يروح
ولازم أكتم مشاعري
مقدرش بيها أبوح
همك ذاتك ومسيرتك
والكل يجيب في سيرتك
الكل مدح نجاحك
وسألوا عن سر كفاحك
قولتيلهم جوزي جنبي
ونجاحي هو حبي
فعلا نجاحك حبنا
ما الناس شايقة وشنا
خلينا نمثل وخلص
أصل الحب مش إحساس
نعيشه قدام الناس
لازم أبان سعيد
وأنا بئس من الأساس

فضلتي نجاحك عن حبنا
ضاع الإحساس مننا
المهم قدام الناس بيان على وشنا
حياتنا بقت خناق
مفيش فيها اتفاق
وكل ماجي أعاتبك
أتهدد بالفراق
مشكلتي لسه بحبك
وعايز أفضل جنبك
بس كل الحكاية
حاسس بقسوة قلبك
حتى موضوع الغيرة
خلاني معاكي في حيرة
شايفاني بكلم غيرك
ولا عمرك جبتي سيرة
عدت أيام وبعاني
سرحان واقف مكاني
وتمر الليالي
بقيت واحد تاني
قلبي بقى حاجة هشة
ضعيف زي القشة
بس القشة تنقذ غرقان

خصوصا لو عاشق ولهان
ظهرتلي واحدة تانية
لقيت معاها حنية
قلبي دق فجأة وقلت هي دية
سمعت كل مشاكلي
من غير ما تعرف شكلي
ما الحب مش ملامح
الحب صريح وواضح
هو اهتمام والإحساس بالأمان
مش كلمة باللسان
قولتلها عايز حنان
وأبقى عاشق ولهان
قالتلي جوة حضني
هو ده المكان
طب كدة هبقا خاين
وأبقا على العشرة هاين
ولا أجري ورا قلبي
وده ذنبك لا مش ذنبي
تعالى الحقيني
خايف أضيع حبي

حقك عليا إن كنت زعلتك

حقك عليا
 يا حبيبي يا أغلى ما ليا
 حقك عليا
 من غيرك أنا مسواش
 من غيرك الحب مجاش
 حقك عليا
 عمري كله هعيشه ليك
 عمري ما يكمل غير لو بيك
 حقك عليا
 أنت ليا أغلى الناس
 عرفت معاك معنى الإحساس
 حقك عليا
 غلطانة وحاسة بندم
 في بعدادك مفيش غير ألم
 حقك عليا
 نفسي أرجع تاني لحضنك
 نفسي قلبي تاني يضمك
 حقك عليا



تعالى نرجع تانى لمتنا

خلاص آن الأوان
 نرجع تانى زى زمان
 ترجع تانى لمتنا
 ومعاها تيجي فرحتنا
 ولا خلىني بعيد
 أفضل عايش وحيد
 بعيد عن جرح جديد
 جايز أكون سعيد
 ما أنا كدة كدة مش ناسي
 إن انت كنت قاسي
 وكنت سبب جرحي
 والحزن والمآسي
 وكل ماجي أنساك
 تيجي في بالي وألقاك
 أثاريني لسه فاكرك
 وبتمنى تانى لقاك
 وأنت كمان فاكرني
 ونفسك تكلمني



بس حاسس بالذنب
علشان في قلبي جارحني
تعالى تاني نتلم
وننسى بقا الهم
ونرجع تاني الفرحة
احنا من نفس الدم

رسالة لكل قلب مجروح: انت تستاهل تعيش

هتفضل لحد امتا مجروح
 خايف حتى بهمك تبوح
 العيب عمره ما كان فيك
 قاعد وحنك مش مكفيك
 قفلت على نفسك بابك
 بس جرحك لسه ما سابك
 بقا هو وحنك شريك
 ماشيين معاك طول الطريق
 ساعات فرحك معدودة
 ما انت حبست نفسك في أوضة
 مكتوب عليها ممنوع الفرح
 ونرحب بكل أنواع الجرح
 بس اللي جرحك عايش سعيد
 عمال في قصة الجرح يعيد
 عايش على جرح الناس
 وعلى القلوب اللي بتنداس
 يجرح فيها ولا همه
 ومحدث عارف يلمه

وأنت على نفسك بقيت جاني
سجنتها وبقيت أناني
لأنك في الآخر إنسان
مشاعر إحساس وكيان
انت تستاهل تعيش
تستاهل فرحة متتنسيش
تستاهل حزنك يروح ميجيش
افتح بابك للأمل
بالعزيمة وبالعمل
عيش حياتك يوم بيوم
افرح يلا وانسى الهموم
متفرحش بالهزيمة
بس اديها حبة عزيمة
لو خسرت مرة في يوم
شد حيلك يلا وقوم
خلي ليك هدف قدام
متبقاش عايش والسلام
انت تستاهل كل خير
بس ابعد عن أذية الغير
عيش حياتك بحب وضمير
وظالما رافعين لربنا إيدينا
لا جرح ولا هم يقدر علينا

اوعى تحزن على قلب بالحب موفاش

هتحنن ليه على قلب سابك وعاش
 هتحنن ليه على حب بالوعد موفاش
 ده القلب اللي زيه نبيعه ببلاش
 وأي لحظة في قربه تروح وما تتعاش
 افرح إنه سابك
 بدل ما تعيش في عذابك
 والجرح اللي نابك
 جرح ميكيناش
 خسارة فيه الدموع
 والورد والشموع
 ده جرحه كان مشروع
 بس ميهمناش
 بلاش تشيل هموم
 وجرح ملوش لزوم
 بس على العموم
 جرحه مكسرناش
 انسى الجرح وعيش
 افرح ومتشكيش



حیینا علی مفیش
بس جرحه مموتناش
یلا یا قلبی انسی
وبلاش علی نفسک تقسی
علی شط الحب هترسی
علی حب میجرحناش



خلاص يا دمعة فارقينا.. يا عن اللي تابعنا فرقينا

ليه يا دمعة عايشة يوماتي معانا
 ليه يا حزن جاي معانا يوم لقانا
 ليه يا حرج ورارنا واراننا بتستنانا
 الضحكة مش لاقية مكان
 شكلها نست العنوان
 قالت الدمعة توهنتني
 وفي سكة بعيد ضيعتني
 وقالتي رجعتني تاني
 ما ده أصلا مكاني
 احنا مولودين بالفرح
 وعيشتنا سعادة مرح
 إيه اللي غير الحال
 وخلي الفرح اتشال
 قلت للدمعة يا تفارقينا
 يا عن اللي تابعنا تفرقينا
 اللي جرحوا فينا وزعلونا
 وفي اللحظة الحلوة جم نسيونا
 أتاريهم قاصدين يعيطونا



وقالوا لضحكتنا تبعد بعيد
والحزن يكرر نفسه ويعيد
وتتكرر الحكاية
ونبص لنفسنا في المرآة
نلاقي دمعتنا نازلة تاني
مش بتغيب ولو ثواني
خلاص فارقونا يالي في بالنا
وخلونا نعيش حالنا
ده عيونا منكم اشتكت
وقلوبنا من غدركم اتملت
ارجعي يا ضحكة وتعال
خلاص اللي كان تابع بالي
عيني مش هتشوفه
والدمع مش هدوقه
والقلب خلاص ارتاح
خلاص جرحه راح



خلاص قلبي قرر يحب تاني

قلبي يريد
 يحب من جديد
 حب بجد
 ميخلفش المواعيد
 ارحموا قلبي وبلاش قسوة
 ده لسه في التجديد
 كرهتوني في نون النسوة
 يالي قلوبكن حديد
 أعملك إيه بس يا قلبي
 قاعد على طول حيران
 مستني ليه قلب يحبك
 وترجع تاني ندمان
 رد عليا وقالي استنى
 شكله في حب جاي
 شكلي أخيرا هتهنى
 بحب ملوش زي
 لا أحسن ابعد أرجوك
 بلاش للحب تروح



عائزهم تاني يخونوك
وترجع تاني مجروح
اهدى شوية بس يا قلبي
خليك أحسن عطلان
قررت أستغنى عن حبي
إلا لو خدت ضمان

رسالة من زوجة تفكره بحبهم

زوجي العزيز...
 وحشني حزنك الدافي
 وحشني كلام حبك
 وحشني الإحساس الصافي
 اللي خارج من قلبك
 هي كلمة بحبك بقت عيب
 ولا فاكرنى حد غريب
 ده أنا حتة منك وانت مني
 بس إحساس حبك لازمني
 أنا مش هستحمل أي إهمال
 حتى لو هتعوضني بمال
 أنا برضه في الآخر إنسان
 قلب إحساس وكيان
 خليني في حبك أسيرة
 أعيش في الحب أميرة
 وأبقا المملكة في حبك
 وأنسى الدنيا جنبك
 أنسى معاك الهموم



وأعيش في حبك كل يوم
أما إحساس الخيانة
حاجة أشبه بالمهانة
مش هينفع فيها أذار
ولا رسايل اعتذار
ساعتها قلبي يبقى مقفول
مش هيسامح مهما تقول
فاوعى تيجي مرة تخون
ولا عليك العشرة تهون
الحب مش بس إحساس
لازم كرامتي قدام الناس
ساعتها هحبك بإخلاص
محتاجة أغرق في حبك
أحس إني ملكة جنبك
محتاجة أخطف قلبك
محتاجة حب وحنان
وحبك لازم بيان
بالنظرة كمان واللسان
وقتها هكون أسيرة حبك



رسالة اعتذار لكل زوجة زعلانة من جوزها

زوجتي العزيزة
 بعد التحية...
 ربنا يخليكي ليا
 بهديكي وردة من بستان قلبي
 علشان صبرتي وفضلتي جنبي
 رغم إني كثير أناني
 وأوقات ببص لحد تاني
 عشتها معاكي بالمقلوب
 وأعدت أطلع فيكي عيوب
 مع إني طلعت أنا المعيوب
 مكنتش مديكي التقدير
 بس كنت عليكى بغير
 جايز واخدها رجولة
 بس مشاعري كانت مقفولة
 برة البيت أعد أضحك وأشاكل
 ومعاكي بس أفكر المشاكل
 أخليكي انتي الملامة
 وانتي تقابليني بابتسامة



لا أثر فيا ولا ساب علامة
بالعكس غلى فيا الدم
وقلبتها عليكي غم
وصوتي بقا عالي
خلى كل الناس تتلم
يومها نمتي معيطة
وجالك أحاسيس ملخبطة
أزعل منه ولا أصلحه
بس قلبي هيزيد جرحه
ونديتي على الدمعة تجيلك
ومليتي بيها مناديلك
ما الضحكة سافرت بالسلامة
فضلت دموع حزن وندامة
حزن على قلب اتجرح واتقل
وندم على عمر راح واتذل
غلطت فيكي وأنا مش حاسس
ولا كنت في عنيني باصص
عنيكي اتكسرت من الحسرة
وأنا قلبي فرحان من النصرة
مانا راجل وصوتي عالي
وكل اللي يقولي مالي
مبقاش عارف اللي جوالي



أصل مش عاجبني حالي
وعدت ليالي وليالي
لحد ما في ليلة افكرت
ورجعت لعقلي وفكرت
لما شوفتك أول يوم
كان بيطير من عيني النوم
وكنت أسعد حد في الدنيا
ووعدتك أشيلك في عينيا
أتاريها بس امنية
وافكرت وعدي لأبوكي
وأهلك لما ليا سابوكي
قالولي دي أغلى هدية
وفعلا وريتهم الشهامة
لما ضيعت منك الكرامة
وخليتك برضه الملامة
وانتي ملكيش أي ذنب
بالعكس انتي أطيب قلب
نظرة منك كانت تنسي
كل همومي وحملي ونفسي
أرجع لحضنك طفل كبير
وأنسي قسوة الدنيا والمشاورير
خلاص راجع إنسان تاني

غيرتي قلبي إحساسي وكياني
زوجتي هي كل حاجة
مش لازم تبقا محتاجة
لازم أحفظ لك كرامتك
قدام الكل أديكي قيمتك
أحبك من غير مظاهر
مش هفضل تاني أظهار
إني مغرم ومتعلق ببكي
خلاص بحبك حب حقيقي
حب لإنسانة شالت واستحملت
ومشاعرها عمرها ما اتجملت
مش بديكي وردة دي باقة ورود
وقلبي متمسك بالوعود
أكون جنبك سندك وحصنك
وحبي ليكي يبقى حارسك
إمضاء
زوجك اللي لسه بيحبك

ادي ابنك حنية من البداية هيطلع راجل في النهاية

ابني أحسن حد في الدنيا
 أديله عمري وكل ثانية
 دايمًا أشجعه وأحفزه
 مقلوش أي كلمة تترفضه
 بلاش أقوله شوف فلان
 خليك أحسن من علان
 كلام هيخليه تعبان
 وبدل ما أطلع عقد زمان
 أقوله أنت أهم إنسان
 هعمل منه بطل
 وأسانده مهما حصل
 وأديله النصيحة
 بطريقة سهلة مريحة
 وبدل الزعيق والخناق
 نقضيتها بالاتفاق
 لازم أديله قيمته
 من صغره أحفظ كرامته
 ولازم ساعة العتاب



تكون من ورا الباب
دي حاجة بيني وبينه
مش علشان أغراب
ولما يبجي النجاح
هعيش معاه أفراح
ما أنا شريك الكفاح
أي حاجة يحيكلي
لو حصل مشكلة يجيلي
حتى لو تعبان
أسمع منه الكلام
ولازم باهتمام
أفضل سهران معاه
لحد ما هو ينام
وأحسسه بالأمان
بالحب وبالأحضان
القسوة متعملش راجل
أصل الرجولة مش بس كلام
دي مسئولية والتزام
اديه حب من البداية
يطلع راجل في النهاية



هتفضلي يا أمي في قلبي

أمي هي الحنية
 لو أقعد أتكلم عن الست دية
 عمري هيعدي
 ولسه لحكايتي بقية
 أصل الحكاية فعلا طويلة
 عمرها ما تخلص في يوم وليلة
 حكاية حب من غير تمن
 وذكريات حلوة وجميلة
 فتحت عينيا لقيتك قدامي
 اسمك كان بداية كلامي
 أمي يا أحلى ما في الدنيا
 صورتك مرسومة دايمًا قدامي
 كبرت وحببي ليكي كبر
 حبك ليا بير بيتحفر
 والحب فيه ملوش نهاية
 قلبي بيه بيتأسر
 معايا في دموعي وضحكي
 بتسمعي همي لما بشكي



حتى في كلامي البسيط
عينيك معايا لما بحكي
فاكرة أول يوم مدرسة
إيدي في إيدك ملمسة
عرفت إني هبعد عنك
قلت دي حاجة مش كويسة
معقولة هبعد عن أمي
طب مين أشكيله همي
عدت ساعة لقيتك معايا
جريت لحضنك ما تضي
الضحكة رجعتلي تاني
ورجعت تاني لأماني
مش عايز حاجة من. الدنيا
معايا مصدر حناني
فاكرة يوم نجاحي
حبك في قلبي هو سلاحي
فاكرة يوم تعبك
ضحكتي علشان مشلش همك
ازاي وأنا عمري فداكي
ودمي في الأصل دمك
دلوقتي دوري أشيلك
وحبي وعمري أديلك

لو كنت في آخر الدنيا
اهمسي بس أجيلك
ربنا يطولك في العمر
بالخير أيامك هتمر
الحب بس هو أمي
من غيرها أنا عيشتي مر





سنون للنشر و التوزيع

تواصل معنا :

11146437

E-mail :-Sonon. Pub@Gmail .com

جميع حقوق النشر محفوظة لدار سنون للنشر و التوزيع
إن أي تصوير أو إعادة طباعه أو نشر بشكل ورقي أو الكتروني
أو ترجمته أو تسجيله صوتيا بدون إذن كتابي مسبق من الدار
يعرض صاحبه للمسائله القانونيه
